

Furriadura in sardu de su contu 'ZAMPE D'ASINO', chi ndi bessit de sa pàgina setantunu (p. 71) de su liburu de MARCO PLACENTINO, "*Soleminis. Leggende e misteri. Contus de forredda*", Dolianova, Edizioni Grafica del Parteolla 2017.

## **'CAMBAS DE MOLENTI'**

Unu òmini fiat furriendi a bidda sua apustis de unu biaxi longu. Fiat po lompi candu iat biu a unu tali acostendisi-nci. Furriendi-sì apalas, iat sparrancau unu tanti sa buca po su spantu: iat biu a unu òmini de bidda sua chi ddu connosciat beni, mortu giai de una pàriga de scidas.

Su tali si fiat fatu biri lestru lestru e ideau a su beni, domandendi agiudu a custu òmini; custu òmini ddi iat nau de eja, no arrennescendi perou a cumprèndi issu etotu chi fessit bisendi-sì o fessit scidu.

Su mortu ddi iat cumandau, puntu po puntu, de nai a is fillas e a sa mulleri ita ddas tocàt a fai po no perdi totu sa sienda sua e po no nci arrui in mala sorti.

Custus duus fiant lòmpius a s'intrada de sa bidda e s'òmini si-nci fiat sètziu acanta de una columna cun d-una cruxi apitzus, ancora stronau, impentzamentau ca no fessit amachiendi-sì diaderus.

Su mortu si-nci fiat sètziu a su costau, e s'òmini, castiendi-ddu mellus, iat biu ca no fiat a peis de cristianu ma comenti chi fessit a cambas de molenti.

A parti de agoa, su spìritu si-nci fiat strantaxau, furriendi-sì conca a sa cruxi e iat aboxinau: «Gesucristu!» e luegus etotu si fiat sparèssiu.

S'òmini fiat andau a domu de sa famìllia de su mortu, iat contau a sa mulleri e a is fillas su chi ddi fiat sutzèdiu narendi-ddas is cumandus chi su mortu ddi iat arrecumandau po ddas agiudai.

Apustis de ddas èssiri postas infatu a custas arrecumandìtzias, sa famìllia si fiat scabùllia de su dannu de nci perdi sa sienda e totus iant cumprèndiu ca su chi si fiat apariu no fiat stètia sceti una bisada.

Pagu prima de lompi a su Paradisu, s'ànima de su mortu iat tentu s'ùrtimu gestu carinniosu, chi sceti po pagu ddu acapiàt a custu mundu; fiat arrennèsciu a dda agiudai a sa famìllia sua e, a s'acabada, a si sarvai s'ànima. //